

Na osnovu člana IV 4.a) Ustava Bosne i Hercegovine, Parlamentarna skupština Bosne i Hercegovine, na \_\_ sjednici Predstavničkog doma, održanoj \_\_\_\_\_ 2015. godine, i na \_\_ sjednici Doma naroda, održanoj \_\_\_\_\_ 2015. godine, usvojila je

## **ZAKON**

o izmjenama Zakona o platama i naknadama u institucijama Bosne i Hercegovine

### Član 1.

U Zakonu o platama i naknadama u institucijama Bosne i Hercegovine („Službeni glasnik BiH“, br. 50/08, 35/09, 75/09, 32/12, 42/12, 50/12, 32/13 i 87/13) član 48. briše se.

### Član 2.

Ovaj zakon stupa na snagu osmog dana od dana objavljivanja u „Službenom glasniku BiH“.

PS BiH, broj \_\_/15  
\_\_\_\_\_ 2015. godine  
Sarajevo

Predsjedavajući  
Predstavničkog doma  
Parlamentarne skupštine BiH

Predsjedavajući  
Doma naroda  
Parlamentarne skupštine BiH

## OBRAZLOŽENJE

### I. PRAVNI OSNOV

Pravni osnov za donošenje Zakona o platama i naknadama u institucijama Bosne i Hercegovine sadržan je u članu IV 4.a.) Ustava Bosne i Hercegovine kojim je propisano da je Parlamentarna skupština BiH nadležna za donošenje zakona koji su potrebni za provođenje odluka Predsjedništva Bosne i Hercegovine ili za vršenje funkcija Skupštine po tom Ustavu.

Ovim zakonom nisu narušene odredbe Člana IX.2. Ustava Bosne i Hercegovine, koji član propisuje da „Naknada za lica koja obavljaju funkcije u institucijama Bosne i Hercegovine ne može biti umanjena *za vrijeme trajanja* mandata nosioca funkcije“. Kako se ovim zakonom ukida pravo na naknadu koja se može ostvariti tek po *isteku* mandata navedeni ustavni princip se jasno ne odnosi na tu vrstu naknade.

### II. RAZLOZI ZA DONOŠENJE ZAKONA

Članom 48. Zakona o platama i naknadama u institucijama BiH („Službeni glasnik BiH“, br. 50/08, 35/09, 75/09, 32/12, 42/12, 50/12, 32/13 i 87/13) propisano je da „Izabrani funkcioneri i nosioci funkcija, nakon prestanka javne funkcije, imaju pravo na naknadu za produženje radnopravnog statusa dok ne steknu radnopravni status kod drugog subjekta ili ne ispune uslove za penziju, a najduže godinu dana počevši od dana prestanka javne funkcije“, te da „Naknada po osnovu navedenom u stavu (1) ovog člana obuhvata osnovnu neto platu sa dodatkom za minuli rad i poreze i doprinose u skladu sa propisima koji regulišu ovu oblast“.

Na osnovu ovog člana zakona i relevantnih odluka Vijeća ministara BiH i Zajedničke komisije za administrativne poslove Parlamentarne skupštine BiH, pravo na navedenu naknadu u institucijama Bosne i Hercegovine trenutno može uživati preko 80 izabranih lica i imenovanih zvaničnika (članovi Predsjedništva BiH, poslanici i delegati u Parlamentarnoj skupštini BiH, članovi Vijeća ministara BiH...), a što predstavlja potencijalno opterećenje za budžet Bosne i Hercegovine u iznosu od **preko 6.500.000 KM** svake četiri godine, kao i određena opterećenja u svakoj pojedinačnoj godini u slučajevima ostavke ili smjene nekog izabranog lica ili imenovanog zvaničnika prije isteka mandata.

Kako se radi o anahronom mehanizmu koji nema opravdanje u današnjem sistemu, a posebno uzimajući u obzir trenutne makroekonomske pokazatelje i izuzetno tešku finansijsku situaciju u Bosni i Hercegovini, značajne potencijalne uštede po budžet Bosne i Hercegovine, kao i opravdano nezadovoljstvo građana naspram privilegija ove vrste, ovaj Zakon predstavlja racionalno i odgovorno rješenje.

### III. OBRAZLOŽENJE PREDLOŽENIH RJEŠENJA

Članom 1. je precizirano brisanje odredbe koja utvrđuje pravo na navedenu naknadu, odnosno člana 48. Zakona o platama i naknadama u institucijama Bosne i Hercegovine („Službeni glasnik BiH“, br. 50/08, 35/09, 75/09, 32/12, 42/12, 50/12, 32/13 i 87/13).

Članom 2. je precizirano da Zakon stupa na snagu osmog dana od dana objavljivanja u „Službenom glasniku BiH“.

#### IV. POTREBNA FINANSIJSKA SREDSTVA ZA PROVOĐENJE ZAKONA

Za provođenje Zakona o izmjenama Zakona o platama i naknadama u institucijama Bosne i Hercegovine nisu potrebna dodatna finansijska sredstva.

Naprotiv, ukidanjem prava na navedenu naknadu ostvarit će se potencijalne uštede po budžet Bosne i Hercegovine u iznosu od preko **6.500.000 KM** svake četiri godine, kao i određene uštede u svakoj pojedinačnoj godini.

Te potencijalne uštede su zasnovane na trenutnom pravu preko 80 izabраниh lica i imenovanih zvaničnika da ostvaruju ovu naknadu u periodu do godinu dana od prestanka mandata, a koje pravo bi im ovim Zakonom bilo ukinuto. Konkretnе potencijalne uštede su kako slijedi:

<b>Funkcija</b>	<b>Osnovna mjesečna plata</b>	<b>Dozvoljena naknada (12 mjeseci)</b>	<b>Broj funkcija</b>	<b>Opterećenje po budžet BiH</b>
Član Predsjedništva BiH	4.756,90 KM	57.082,80 KM	3	171.248,40 KM
Predsjedavajući Vijeća ministara BiH	4.281,21 KM	51.374,52 KM	1	51.374,52 KM
Zamjenik predsjedavajućeg Vijeća ministara BiH	4.186,07 KM	50.232,84 KM	2	100.465,68 KM
Poslanici i delegati u Parlamentarnoj skupštini BiH	3.995,79 KM	227.760,37KM	57	2.733.124,44 KM
Ministar	4.043,36 KM	48.520,32 KM	7	339.642,24 KM
Zamjenik ministra	3.567,67 KM	42.812,04 KM	10	428.120,40 KM
Direktor OSA-e	3.805,52 KM	45.666,24 KM	1	45.666,24 KM
Zamjenik direktora OSA-e	3.329,83 KM	39.957,96 KM	1	39.957,96 KM
Glavni inspektor OSA-e	3.091,98 KM	37.103,76 KM	1	37.103,76 KM
<b>UKUPNO osnovne plate</b>			<b>83</b>	<b>3.946.703,64 KM</b>
MINULI RAD				cca. 730.000 KM
DOPRINOSI				cca. 1.870.000 KM
<b>UKUPNO osnovne plate, minuli rad i doprinosi</b>				<b>cca. 6.546.703,64 KM</b>